



Gabinete Wever - Croes II

ISLAONLINE

Noticia di Gobierno

2023

Dialuna 11 September 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



Prome Minister durante clausura di su discurso den Parlamento: "NOS COMPROMISO TA PA SIGUI TRAHA CU TUR NOS FORSA, PA PROGRESO Y BIENESTAR DI CADA CIUDADANO DI PAIS ARUBA"

Na clausura di e reunion den Parlamento, Prome Minister Evelyn Wever-Croes a duna su discurso final elaborando riba e situacion actual di pais Aruba. El a splica cu apesar cu tin hopi division den pueblo, y den Parlamento, pa loke ta e negociacionnan cu Hulanda, Gobierno lo sigui na mesa, mescos cu a haci semper, teniendo na cuenta lo cual cu Parlamento ta indica. Tin un apertura na mesa, y Gobierno lo probecha di esaki cu un actitud di optimismo, fe y determinacion, cu e vision pa trece bienestar pa henter e comunidad di Aruba.



Prome Minister a indica cu Aruba ta den pleno recuperacion. Ambos, economia y turismo a yega nivelnan di prome cu pandemia. Desempleo y inflacion a conoce un bahada drastico, haciendo asina cu Aruba ta un pais mas sigur. "Nos por mira e progreso y bienestar, aunke cu ainda nos no a yega

na unda nos lo mester yega. Tin hopi ciudadano ainda cu no ta experienciando e progreso y bienestar aki, y pesey Gobierno ta comprometi cu cada ciudadano di e pais aki, pa sigui traha cu tur forza pa asina nan tambe por goza di e bienestar y progreso aki, sin laga niun hende atras" Prome Minister a expresa.

Prome Minister Evelyn Wever-Croes: **PROME MINISTER TA ORGUYOSO DI UNIVERSIDAD DI ARUBA, PA 35 AÑA CREANDO PROFESIONALNAN NA ARUBA**



Diabierna mainta, Prome Minister Evelyn Wever-Croes tabata presente na e apertura di e aña academico di Universidad di Aruba. Prome Minister a splica cu den pasado su persona tabata parti di college curatoren na Universidad, na unda el a yuda duna forma na kico ta e vision di un pais chikito manera Aruba cu su propio universidad. Di eynan el a expresa di ta sumamente orguyoso di tur loke Universidad di Aruba a logra den e ultimo añanan.

Minister di Enseñansa, Endy Croes na e ocasion a duna un discurso felicitando cada estudiante y a desea cada uno exito den e aña nan dilanti.

"Mi kier a felicita universidad cu nan di 35 aniversario, y desea tur e studiantenan un aña academico hopi fructifero. Na tur esnan cu ta duna les, mi ta desea hopi pasenshi y sabiduria, den crea nos futuro profesionalnan pa Aruba.

Tambe a haci entrega di un buki di 35 aniversario di Universidad di Aruba na S.E. Gobernador di Aruba, Señor Alfonso Boekhoudt. E mainta a termina den un Exhibicion y Recepcion hopi ameno cu tur presente.



Prome Minister Evelyn Wever-Croes: En conexion cu celebracion 70 aña Arubaanse Muziekschool **PROME MINISTER TA GRADICI TUR ESNAN CU TA HACI POSIBEL PA E EXISTENCIA DI E SCOL Y PA CREA BON MUSICONAN NA ARUBA**



Prome Minister Evelyn Wever-Croes tawata presente na e celebracion di 70 aña di Stichting Arubaanse Muziekschool na unda el a duna un discurso gradiciendo tur esnan cu di un of otro forma ta haci posibel pa e existencia di e scol y pa crea bon musiconan na Aruba.

Stichting Arubaanse Muziekschool a wordo funda na aña 1953 despues cu e director di Cultureel Centrum Aruba (C.C.A.) di e tempo ey, Sr. Folkert Steenmeyer a haci un anuncio na un radio conoci na Hulanda cu e intento pa haya docentenan di musica bin Aruba pa duna les. Aki, un tal Sr. Arie Born, un docente di piano Hulandes a tuma e iniciativa aki di bin Aruba pa duna les di piano. Bao guia di Cultureel Centrum Aruba, a forma e scol di musica Arubano cu tabata resorta directamente bao di Cultureel Centrum. E tempo ey a nombra Sr. Born mes como director di e scol. Sr. Born a cuminsa duna les na 1951 na su cas mes.

For di comienso a cuminsa atrae fondonan pa paga e maestronan y a logra haya sosten financiero for di diferente compania entre otro Refeneria Lago Oil & Transport Company. Gobierno Insular di e tempo ey tambe tabata contribui cu loke tabata por. E fondonan aki a contribui cu lesnan tabata wordo ofreci den tur bario na Aruba y na cas di e estudiante.

Awor pa hopi aña caba e unico subsidio cu e scol ta ricibi ta di Gobierno. E subsidio aki, a pesar cu e ta cuantioso, no ta suficiente, y e diferencia ta wordo cubri cu entradanan di lesgeld. Esaki ta haci cu e scol ta financieramente solido.

“Nos Gobierno, mescos cu Gobiernonan prome cu nos, a mira y ta mira e importancia den crea musiconan na y pa Aruba, e importancia di mantene nos tradicionnan musical, nos musica crioyo, y tambe pa nos tin musiconan pa crea otro



tipo di musica pa nos Arubianonan. Gustonan ta varia, pero e musico cu ta wordo crea por cumpli cu tur. Nos mester di nos musiconan local. Musica ta bida, musica ta trece ALEGRIA”, Prome Minister a expresa.

Prome Minister a remarca cu e mes tambe ta bin di un famia musical y varios miembro di su famia a acudi na Arubaanse Muziekschool pa nan preparacion musical. Un familiar sigur hopi conoci na Aruba ta Hildward Croes (QEPD). Danki na e preparacion cu el a ricibi na e scol aki, cu e por a sigui su estudio musical den exterior. Y ta hopi nos por menciona cu ta ex-alumnonan di e scol aki cu a bira musiconan grandi.

Varios docente actual y ex-docentenan, ta personanan cu a haya nan preparacion na Arubaanse Muziekschool. E ultimo director di e scol cu a laga un legado atras, Sr. Chucho Hoek den feliz memoria, tambe tawata un estudiante na e scol di muscia. Y esaki ta e bunitesa di e scol. E ta crea personanan cu ta bin bek pa dedica nan arte na nos comunidad creando cancionnan nobo, aregla cancionnan pa nos cantantenan y pa gruponan musical.

Continuacion PROME MINISTER TA GRADICI TUR ESNAN CU TA HACI POSIBEL....

“Como Gobierno, pero tambe como un yiu di tera, mi ta hopi orguyoso di tur loke Muziekschool a logra pa Aruba, di tur cu ta cu Muziekschool ainda, y esnan cu den pasado tabata cu Muziekschool. Y sin lubida, tur otro cu a y ta coopera pa tene e scol aki na bida. E ta un esfuerzo grandi locual boso ta haciendo, pasobra nos sa cu e no ta facil, pero e ta necesario si. Danki di curason”, Prome Minsiter a expresa.

Y na final di su discurso, Prome Minister a remarca: “Laga e scol aki ta un ehempel di con un solo persona ta pone un bala lora, y ta touch e curason di miles di ciudadano, y awe 70 aña despues ainda e bala ta lorando. Pues nunca perde speransa pa lansa bo idea... bo no sa nunca cuanto tin eyfo cu por yuda bo realisa esaki.

Den nomber di gobierno di Aruba, mi ta felicita tur esnan responsabel pa e porvenir y bienestar di e scol y e stichting, hopi hopi mas aña di aniversario y sigui crea mas artista pa nos dushi Aruba”.





Xiomara Maduro
MINISTER

MINISTER MADURO DI FINANSA A REUNI CU E COLEGIO DI CAFT PA DUNA UN BISTA RIBA E AVANSENAN CU TIN RIBA E MANEHO FINANCIERO DI ARUBA

Recientemente Minister Maduro di Finansa hunto cu Minister President a reuni cu e Colegio di Supervision Financiero CAFT pa asina duna un bista riba e avansenan cu tin riba e maneho financiero di Aruba. Ta un reunion cu ta tuma luga regularmente pa asina e Colegio di CAFT por ta informa riba nivel di mandatario riba e trabounan cu ta wordo haci y decisionnan cu ta wordo tuma pa asina por mehora e maneho financiero di nos Pais.

Topiconan trata cu CAFT

Topiconan cu a wordo trata ta, entre otro, entrega di Presupuesto 2024 na tempo na Parlamento, ehecucion di Presupuesto 2023 y hunto cune e raportahe financiero di cada kwartaal den URK, e retraso den Cuentanan Anual di Pais Aruba, cumplimiento 'compliance' cu impuesto, e estructura pa atende cu inversion publico, y a duna un bista di e negosacion cu Hulanda pa locual ta e refinanciamiento di e debe haci pa surpasa e pandemia.

Presupuesto na tempo y cu surplus

Mester bisa cu CAFT mescos cu Raad van Advies tin elogio pa e hecho cu Gobierno a logra cumpli dos aña tras di otro pa entrega Presupuesto di Pais Aruba na ora segun nos Constitucion. Nan ta constata tambe cu e presupuestonan ta cumpli cu e normanan, pa cual ta importante cu lo tin un surplus di 1% cu ta necesario pa baha e presion di gasto di interes.

Atencion pa gasto

CAFT ta pidi atencion pa maneho di e otro gastonan tambe di gobernacion, pa cual Minister Maduro a informa cu hunto cu Banco Mundial ta preparando pa haci un 'Expenditure Review'



den cual ehercicio financiero por haya un bista unda lo por corta gasto sin cu esaki ta afecta e operacion basico di gobernacion.

Retraso den raportahe financiero ta wordo atendi

Minister Maduro a amplia tambe riba e retonan cu a logra surpasa pa asina por produci e raportahenan financiero necesario pa CAFT por haci nan di control financiero. Despues di 10 aña di trabou continuo, luna pasa Departamento di Finansa ta logra haya nan certificado di e compania CapGemini cu ta sigura cu e trabounan pa 'update' e sistema automatiza di administracion financiero di Pais Aruba a keda completa. Esaki lo facilita e produccion di raportahe financiero y una bes keda cla cu e parti di capacidad humano, nos por sigura cu retrasonan den URK y Cuenta Anual lo pasa pa historia. Pa e ultimo aki a comparti cu CAFT un schema cu ta muestra con e retraso den Cuentanan Anual lo keda resolvi pa asina na september 2024 por entrega e Cuenta Anual di aña 2023 pareu cu e Presupuesto 2025, cerando asina e ciclo presupuestario di aña 2023.

Continuacion MINISTER MADURO DI FINANSA A REUNI CU E COLEGIO DI CAFT....

DIMP cu hopi avanse

Riba e tereno di compliance cu impuesto, Minister Maduro a splica, entre otro, di e adelanto cu tin na Departamento di Impuesto (DIMP) na unda despues di 40 aña ta logra 'haal in' e retraso den atende cu 'aangifte loonbelasting.' Na e momentonan aki ya ta pagando restitucion di aña 2022. Awo cu yudansa di TWO ta set up un team cu lo bay atende cu e cartanan di obheccion pa asina e retraso den 'bezwaar' tambe wordo resolvi a corto plaso.

Structura pa atende cu inversion publico

E topico di inversion publico a wordo trata cu CAFT den un reunion apart hunto cu Minister di Economia, e ehecutivonan di Departamento di Finansa y Departamento Economico cu ta trahando ya pa 3 aña caba den un Comision cu ta evalua tur e peticionnan pa inversion publico. Inversionnan cu ta cumpli cu e criterionan stipula, ta haya prioridad pa wordo inclui den Presupuesto. Di e manera aki ta percura pa inversionnan por tuma luga na un manera structura. CAFT mescos cu CARTAC, cu ta e organizacion Caribense di IMF, ta elogia e hecho cu Gobierno di Aruba ta aplicando e sistema organisa aki di trata cu inversion, cual ta un novum den henter Caribe.

Negosacion pa refinancia debe cu Hulanda

Por ultimo Minister President a duna CAFT un bista riba e negosacion cu Hulanda riba e refinanciamento di e debe cu Aruba a acumula pa por a surpasa e pandemia. A indica cu e negosacion ta bay den bon ambiente y ta spera di pronto por tin claridad riba esaki. E mandatario a indica cu tur esten tur cos lo sigui manera custumber conforme e reglanan y normanan di e supervision financiero.



MINISTER MADURO DI CULTURA A REPRESENTA GOBIERNO DI ARUBA NA E CELEBRACION DI DIA DI BONEIRO



Dia 6 di september Minister Maduro di Cultura riba invitacion di Diputado encarga cu Cultura sr. James Kroon, tabata na Boneiro pa e celebracion di Dia di Boneiro. Minister Maduro tabata tin e placer di por a presencia un bunita Acto Protocolario sigui pa un recepcion pa duna danki na Boneiro su baluartenan cu a wordo honra como 'Suidadano di Honor.' Anochi e mandatario tabata presente pa celebra memey di e Pueblo di Boneiro nan dia special yena cu musica.

E celebracion a cuminsa cu un bunita oracion y alabansa sigui pa discurso di Gezaghebber suplemeente sr. Nolly Oleana y Diputado sr. James Kroon, y despues e programa tabata yena cu canto, musica y baile pa resalta e tema di e celebracion, 'Hunto nos ta forma un Komunidad.'

Pa Minister Maduro tabata bunita pa mira e reconocimiento di e musico sr. Dwight Leoneta como 'Siudadano di Honor' di Boneiro pa su aporte grandi na musica na su isla natal Boneiro. Dwight ta residencia na Aruba y ta un musico cu ta aporta grandemente na diferente banda, festival y ta un genio den e genero musical di ritmo combina.

Na e ocasion special aki pa e Pueblo di Boneiro, Aruba tabata representa pa Presidente di Parlamento, sr. Edgar Vrolijk y Minister Maduro di Cultura, cu a percura pa tur presente por a sinti e brasa di hermandad y e aprecio cu e Pueblo di Aruba semper tin pa e Pueblo di Boneiro.

Minister Maduro ta gradici Diputado sr. James Kroon pa e invitacion y ta felicita y gradici e Pueblo di Boneiro pa e bunita recepcion pa su persona na ocasion di e celebracion di Dia di Boneiro.





POTRETAN DI CELEBRACION
DI DIA DI BONEIRO





E PROGRAMA DI “IMPROVING LIVES TOGETHER” A CUMINSA



Diasabra mainta Minister di Turismo y Salud Publico sr. Dangui Oduber tabata presente na Club Roy caminda a tuma lugar e kick off event di “Improving Lives Together”. Den e evento aki e mandatario a duna un discurso dirigi na tur e participantenan cu ta bay forma parti di e programa.

E programa di “Improving Lives Together” ta un programa cu tin un duracion di 3 luna caminda tur e participantenan lo ricibi guia intenso di nutricionistanan y di entrenadornan (fisioterapistanan). Guia cu lo yuda e participantenan pa hiba un bida mas saludabel atraves di come saludabel y haci actividadnan fisico. Esaki lo conduci na mehora e calidad di bida di cada participante.

Minister Oduber su maneho ta basa riba prevencion. Na aña 2019 pa prome biaha Aruba a traha riba un Plan Nacional di prevencion di malesanan no transmisibel (NCD's). Esaki ta un plan cu a wordo traha enconhunto cu PAHO, Departamento di Salud Publico y diferente stakeholders den e tereno di salud. E plan aki yama NCD National Multisectoral Action Plan pa aña 2020-2030. E plan aki ta hopi importante pa mantene e fondo di AZV sostenibel. Mas importante ta cu e plan aki lo percura pa aumenta e calidad di bida den nos poblacion.

Aruba no ta un di e paisnan di mas saludabel, nos poblacion ta sufri grandemente di malesanan cronico. E malesa cu Aruba ta score nr 1 riba dje mundialmente ta diabetes. Malesanan cronico (NCDs) hopi biaha ta relata na nos estilo di bida,



comemento insaludabel, inactividad fisico y otro habitonan manera humo y exceso di alcohol. Tur e indicatornan aki ta ocasiona diferente tipo di malesanan cronico.

Minister Oduber su meta principal ta pa inverti y duna e atencion necesario na actividadnan cu ta preveni pa nos hendenan bira malo y promove un mihor calidad di bida. Esaki ta programanan intervencion manera Healthy Lifestyle Center (HLC) cu a habri su porta na februari di e aña aki. Minister Oduber ta satisfecho den e prome 7 luna di HLC ya caba nan tin 117 persona cu a yega pa ricibi guia di nos profesionalnan. Guianan di nutricionistanan, terapistanan y tambe di entrenadornan, tur den cuadro pa cambia nan estilo di bida pa uno mas saludabel. E mandatario a gradici tur e profesionalnan di Healthy Lifestyle Center y DVG, Club Roy. Danki tambe na tur e empleadonan di Club Roy cu lo duna guia na e participantenan. Tambe un agradecimento na Fundacion Prevencion den Salud Aruba pa yuda cu e financiamiento di e proyecto aki.

Minister Dangui Oduber ta sumamente contento y orguyoso di por a duna e inicio di e programma “Improving Lives Together”. Finalmente e mandatario a felicita tur e participantenan pa e corahe cu nan a desplega y deseanan tur clase di exito durante nan trayectoria. Minister Oduber kier crea un movicion di prevencion pa inspira y motiva Aruba pa cuida nan salud, move, come saludabel y mehora nan calidad di bida. Hunto nos lo bai logra.



A LANSA E PROYECTO "WEGA Ariba WIEL"



E proyecto di veilige bario's ta un concepto caminda un di e pilarnan di e proyecto aki ta pa reactiva nos centronan di bario y percura pa mas actividad den e barionan. Pa logra esaki, Gobierno di Aruba a sera un acuerdo cu CEDE Aruba como tambe e centronan di bario pa aloca mas fondo y percura pa un restructuración.

Manera ta conocic, bou guia di CEDE Aruba, a tuma diferente personal den servicio pa asisti e centronan di bario. Dentro di

poco e website pa tur e centronan di bario tambe lo keda cla y di e forma ey ta mas visibel kico tur ta ofrece den cada bario.

Durante e actividad "ban caya" den Noord, caminda ful comunidad por a participa na diferente deporte y alabes haya informacion di e veld social y salubridad, a lansa e siguiente proyecto cu ta "Wega Ariba WIEL".

A traves di un bus, "WAW mobiel", lo drenta den e barionan y ofrece muchanan y hobennan pa participa na actividadnan deportivo. E bus ta ful ekipa cu material di sport y esaki ta bou guia di instructornan di IBISA.

E exito di e proyecto veilige bario's, caminda e aña aki ainda tin mucho mas proyecto cu lo wordo lansa, cual ta e cooperacion y colaboracion entre e diferente Ministerionan, organisacionnan y centronan di bario. Di parti di Ministerio di Husticia y Asuntonan Social nos kier gradici y felicita CEDE Aruba, centronan di bario, IBISA y FCCA pa ehecucion di "Wega Ariba WIEL".



MINISTER ENDY CROES A DESEA E STUDIANTENAN DI COLEGIO EPI HOPI EXITO CU NAN PASANTIA NA IBEROSTAR NA RIVIERA MAYA, MEXICO

Tres estudiante di e Sector di Hospitalidad y Turismo a biaha pa eherce nan pasantia den exterior durante cuater (4) luna



Diamars ultimo, Minister di Enseñansa y Deporte Endy Croes hunto cu team di Colegio EPI: directora Ankie Danker, Sr. Andres Geerman cu ta forma parti di e directiva y coordinado di stage Sra. Eddelyn Dijkhoff, tabata presente na e sala di VIP di Aeropuerto Internacional Reina Beatrix pa despedi di tres (3) estudiante di Colegio EPI cu ta bay den exterior pa eherce nan pasantia. Tambe presente na e ocasion aki tabata PR di Iberostar Sra. Ghislaine de Windt, kende a elabora riba e pasantia di e studiantenan di Colegio EPI den exterior. Sra. de Windt a expresa cu nan ta orguyoso di anuncia nan sponsorship pa e segundo grupo di estudiante cu ta biaha na Iberostar Playa Paraiso na Riviera Maya, Mexico, pa eherce nan pasantia. E periodo di pasantia ta di 5 di september 2023 te cu 13 di januari 2024.

E di dos grupo aki lo haya diferente experiencia den diferente posicion den “front of the house” di e hotel, entre otro, relacion publico, servicio pa guest y “Front Desk Reception”. Parti di e compromiso di Iberostar ta pa fomenta talento hoben di Aruba. Iberostar a brinda alohamento completo y sosten pa nos studiantenan durante e periodo di pasantia. Pa duna bek na e comunidad y inverti den e futuro lidernan di Aruba. Directora



di Colega EPI Sra. Danker ta gradici Gobierno di Aruba y Iberostar pa haci esaki posibel. Unabes cu e studiantenan aki termina, nan tin trabou garantisa. Sra. Danker ta encurasha nos studiantenan pa studia na Colegio EPI, paso nan ta haya un oportunidad unico di eherce nan pasantia den exterior y desaroya nan mes.

Banda di esaki, coordinado di pasantia di Colegio EPI Sra. Dijkhoff ta expresa cu ta agredido na Iberostar pa duna e studiantenan oportunidad pa eherce nan pasantia den exterior y ta encurasha tur otro compania cu kier colabora cu Colegio EPI pa acerca nan pa hunto yuda engrandece Pais Aruba. Sr. Andres Geerman a indica cu Colegio EPI tin diferente programa, unda ta yuda e studiantenan desaroya y bira internacional. E studiantenan Ashley Frans, Chevy van der Linde y Eleni Dijkhoff a expresa cu nan ta hopi contento cu e oportunidad aki cu nan a haya pa eherce nan pasantia den exterior. Pa finalisa, Minister Endy Croes ta gradici Gobierno di Aruba, Colegio EPI y Iberostar cu a traha den colaboracion pa realisa e proyecto aki y ta desea tur tres (3) estudiante hopi exito durante nan pasantia di cuater (4) luna na Iberostar Playa Paraiso na Riviera Maya, Mexico.

MINISTER ENDY CROES TA FELICITA E COREDONAN CU PARTICIPA DEN E 43 EDICION DI TURIBANA RACE 2023



Diadomingo ultimo, den oranan tempran di mainta a tuma luga e di 43 edicion di Turibana Race. E careda a conta cu mas di 400 participante cu a core 10.5 K den e area di Noord y vecindario. E participantenan a participa den tres (3) diferente categoria; individual, duo of duo gubernamental. Minister Endy Croes tabata presente pa duna sosten y motivacion na e participantenan. Na final di e mainta, e mandatraio di Deporte a haci entrega di trofeo na e ganadonan den diferente categoria.



Tabata reina un ambiente total banda di caminda unda cu famia-, colega- y amistadnan di e coredonan a bay duna apoyo. Sr. Luuk Loo (41:11) y Sra. Lana Gobert (43:37) a sali e ganadonan absoluto di e 43 edicion di Turibana Race 2023. Pa finalisa, Minister Endy Croes ta felicita IBISA Aruba cu a organisa e gran evento deportivo aki. Tambe, ta gradici tur cu a contribui pa haci e careda aki uno exitoso. Ademá di esaki, e mandatario di Deporte ta aplaudi tur esnan cu a participa den Turibana Race 2023. Masha pabien na tur e ganadonan! Cu disciplina, deseo, dedicacion y determinacion ta logra.



MINISTER ENDY CROES TA GRADICI TUR ESNAN CU A CONTRIBUI PA HACI CAMPEONATO INTERNACIONAL COPA LATINO AMERICANO BMX 2023 NA ARUBA EXITOSO

Pabien na e participante- y ganadonan di diferente categoria durante e campeonato di Copa Latino Americano BMX 2023

Durante fin di siman, a tuma luga e campeonato internacional Copa Latino Americano BMX 2023 na e pista di BMX di Parke Curazon Jaburibari cu rond di 170 coredo di 11 pais, entre otro, Argentina, Aruba, Belgica, Brasil, Chile, Colombia, Curaçao, Ecuador, El Salvador, Mexico y Venezuela. Minister di Enseñansa y Deporte Minister Endy Croes tabata presente hunto cu Aruba Wieler Bond y comision di BMX, kendenan ta organisado di e campeonato Copa Latino Americano BMX 2023. Tambe tabatin diferente presidente di federacion internacional presente, entre otro, Confederacion Latino Americana de BMX (COPAB), Union Cycliste Internationale (UCI), Confederación Panamericana de Ciclismo (COPACI).

E bishitantenan internacional a expresa di ta hopi contento cu e pista nobo di BMX, cual ta cumpli cu e standardnan internacional. Un tremendo campeonato, unda cu a entrega diferente premio den diferente categoria. Minister Endy Croes ta felicita tur e participante- y ganadonan di e campeonato Copa Latino Americano BMX 2023. E careda aki tabata valido pa acumula puntuacion pa clasificacion pa Weganan Olimpico 2024. E mandatario di Deporte ta gradici tur esnan cu a contribui pa realisa e proyecto aki, esta Ministerio di Deporte, Gabinete Wever – Croes II, Fundacion Facilidatnan Deportivo (FFD), Lotto pa Deporte, N.V. Elmar, Quick Electrical N.V., Timeline Services, Aruba Wieler Bond (AWB), comision di BMX, ATA y e mayornan cu a traha hunto pa por a logra realisa e bunita proyecto aki pa nos hobennan.





ORA BO IDENTIFICA UN OPORTUNIDAD PA BO PAIS, BO MESTER GARA ESAKI CU DOS MAN



Den un conferencia di prensa, Minister di Energia Glenbert Croes a duna un splicacion, riba e impacto economico grandi cu e "partnership" entre Aruba y Acciona Energia, lo tin pa e economia di nos pais. Minister Croes a indica cu e MOU firma pa WEB, Utilities, RDA y ELMAR cu Acciona Energia pa realisa Aruba Hydrogen Valley, ta un paso grandi y positivo pa pais Aruba y cu Gobierno ta sumamente orguyoso di dje. Mester remarca cu e insinuacionnan eyfo cu e compania di Eagle LNG y Acciona Energia, cu un lo elimina e otro ta completamente falso. Nan lo co-existi cu otro, na unda comunidad di Aruba lo biba den un ambiente economico unda tur dos ta bay ta disponibel pa nos comunidad, economia y pa exportacion.

Minister Croes a indica di ta contento cu Gobierno a logra yega na un acuerdo cu Acciona Energia cu ta e prome operador na mundo dedica exclusivamente na energia renobabel. Un compania grandi y renombra, cu tin mas di 45 mil empleado, un entrada di mas di 20 biyon Euro, y 29 aña di experiencia. Tambe, e compania tin un presencia global na mas di 10 diferente pais

rond mundo, entre otro Merca, Canada, India, Chile, Portugal, y proximamente na Aruba. E acuerdo entre Aruba y Acciona Energia ta muestra cu nos ta comprometi cu decarbonisa.

Aruba como isla den Caribe y cu un solo fuerte ta e pais ideal pa e proyecto di e Green Hydrogen Valley. E green hydrogen lo cumpli cu e normanan di EU y lo ta competitivo den costo, mirando cu Aruba ta den e top 5 paisnan na mundo ideal pa genera electricidad a base biento y solo. Tambe e ubicacion di e isla ta un bentaha, mirando cu e ta accesibel pa bende y produci e green hydrogen. E "business model" pa e green hydrogen bira un otro pilar economico a base di exportacion, lo tin un impacto grandi pa pais Aruba.

Minister Croes a indica cu e proyecto aki ta nobo pa Aruba, pero ta kere cu na momento cu un oportunidad wordo identifica pa bo pais, bo mester bras'e y realise'. Pesey mirando e oportunidad grandi aki, Aruba a busca conseheronan internacional pa guia nos den e direccion corecto pa por realisa e proyecto aki.

E Aruba Hydrogen Valley lo bay genera empleo, y door di exportacion, e impacto ta bay ta hopi mas grandi cu loke nos economia local lo por consumi, e entradanan pa pais Aruba lo ta impactante, contribuyendo na un nivel di prosperidad mas grandi. Como pais chikito, Aruba lo produci gas natural y hidrogeno.

"Mi ta acredita Prome Minister Evelyn Wever-Croes pa como Minister di Energia, pa a bin cu e National Energy Policy. Tambe mi ta admira e pasion di coleganan di coalicion riba e tema di hidrogeno. Y pami como Minister di Energia actualmente, e ta un honor di por ta e acelerador den haci e visionnan aki bira realidad" Minister Croes a expresa.

CONCURSO di Pintamento 2023



Bo Kier Participa?

1. Participacion ta gratis! Tur muchanan di scol basico por participa (1e - 6e klas)
2. Si bo no a ricibi e formulario na scol, bo por download e formulario via: specialprojectsaruba.org
3. Tarea 1: Duna bo cacho un number
Tarea 2: Pinta un (of mas) cacho den cura
4. Bo pintura mester ta uno original y creativo, e pintura mester ilustra un cacho den cura y bo por incorpora mas di e puntonan di e Ley di Cacho den dje
5. E pintura mester ta den color y mester ta pinta door di e mucha mes
6. Un (1) pintura pa cada participante; entrega bo formulario no mas tarda cu dia 22 di september 2023 na Bestuurskantor Oranjestad, na HBK San Nicolas, of na e MFA mas cerca dibo
7. E ganadornan di cada klas lo wordo anuncia dia 4 di oktober 2023 Dierendag riba e pagina facebook di Gabinete Wever-Croes
8. Lo tin un regalito pa tur e ganadornan cu lo wordo entrega fin di oktober

Ley Di Cacho!



- Bo cacho mester ta den cura y no riba caya
- Bo cacho mester por tin suficiente espacio pa e por move den su cura y mester por sconde pa awasero, biento y solo, dus bo cacho mester tin un casita of mester por bay bou un dak
- Bo mascota mester haya awa limpi pa e bebe y cuminda fresco y adecuado, dus duna bo cacho cuminda di cacho
- Ora bo kier keiro cu bo cacho, mara un liña na su banchi pa bo tene, pa por tin control riba dje y mester piki su sushi si e pupu ora boso keiro 🍌
- Hiba bo mascota dokter di bestia ora e ta birando malo, ora e mester haya su vacuna, y ora e mester opera, por ehempel pa bo cacho no haya puppies



Informacion di Participante



Number y Fam: _____
Fecha di Nacimiento: _____ Edad: _____
Scol: _____ Klas: _____
Number di Telefon di Mayor: _____



Un nomber faborito pa bo cacho: _____

Area pa pinta ↓

Area pa pinta ↓



Union ta e forsa di un ekipo, famia y
nacion pa logra cada meta pa e
bienestar humano. Ban sigui den
positivismo pa engrandece nos pais.